

四庫全書

經部

欽定四庫全書

五禮通考卷六十六

刑部尚書秦蕙田撰

吉禮六十六

宗廟制度

禮記月令孟冬之月命工師效功陳祭器案度程毋或
作為淫巧以蕩上心必功致為上物勒工名以考其誠
功有不當必行其罪以窮其情

注霜降而百工休至此
物皆成也工師工官之

長也效功錄見百工所作器物也主於祭器祭器尊也
度謂制大小也程謂器所容也淫巧謂奢偽怪好也蕩
謂搖動生其奢淫刻勒刻也刻工姓名於其器以察其
信知其不功致也功不當者取材美而器不堅也疏
於是之時冬閉無事命此工官之長效實百工所造之
物陳列祭器善惡案此器舊來制度大小及容受程限
多少或有也勿得有作過制之巧以搖動在上生奢侈
之心必功致為上者言作器不須靡麗華侈必功力密
致為上又每物之上刻勒所造工匠之名於後以考其
誠信與否若其用材精美而器不堅固則功有不當必
行其罪罰以窮其詐偽之情百工造作器物
則諸器皆營經直主於祭故云祭器尊也

方氏慤曰功即工之所成者效與效馬效羊之效同
義蓋呈效之也工之所成具乎器故繼言陳祭器焉
祭器未成不造燕器故以祭器為主因其陳而索之
以度程近取諸身而手有寸長短之數所起也夫是

之謂度遠取諸物而未有黍多少之數所起也夫是之謂程案則據此以驗彼也案以度則制之長短無不中度案以程則功之多少無不中程

周禮地官鄉師正歲稽其鄉器比共吉凶二服間共祭

器鄉共吉凶禮樂之器

注祭器者簠簋鼎俎之屬間胥主集為之疏云祭器簠簋者

案特牲同姓用簠少牢皆用敦同姓者乃用簋今言簠者況義耳

蔡氏德晉曰此先王教民使成禮俗之要法也蓋教民必以禮樂而行禮樂必有其器然五禮六樂之器繁多民不能戶制而家造也惟鄉吏集合衆材以為

之而後比閭族黨之間莫不有其器以為行禮樂之具使其民於鼎俎之旁樽罍之下琴瑟鐘鼓之間無日而不周旋狎習焉所以人人知禮樂之意而成粹美之俗也或疑吉凶二服人當自製何為欲比長集為之然考傳云命婦成祭服記云無田祿者不設祭器有田祿者先為祭服則自庶士以下祭服或不能自備又考古之喪服其變除之節甚煩恐喪家非士大夫之富厚者亦不能一一詳備又有弔服非所常

用者今比長預集五家之財為吉凶二服藏之以待
用用畢復收藏之以待復用固良法也至如記言大
夫祭器不假聲樂皆具非禮也則自命士以下吉凶
禮樂之器俱不能自備可知今有閭師族師以及州
長鄉大夫等集合衆財為之則器無不備而禮人人
可行矣

夏官小子釁邦器

注邦器謂禮樂之器及祭器之屬雜記曰凡宗廟之器其名者成則釁之以緇

豚疏祭器即籩豆
俎簋尊彝器皆是

禮記王制大夫祭器不假祭器未成不造燕器

注造為也疏

皇氏云此謂有地大夫故祭器不假若無地大夫則當假之故禮運云大夫祭器不假聲樂皆具非禮也謂無地大夫也

曲禮大夫士去國祭器不踰竟大夫寓祭器於大夫士

寓祭器於士

注此用君祿所作取以出竟恐辱親也寓寄也與得用者言寄覲已復還疏祭器

不踰竟者既明出禮先從重物為始也踰越也此祭器是君祿所造今既放出故不得自隨越竟也注云此用君祿所作取以出竟恐辱親也無德而出若猶濫用其器是辱親也隱義云嫌見奪故云恐辱親也大夫寓祭器於大夫士寓祭器於士者寓猶寄也既不將去故留寄其同僚必寄之者冀其復還得用也魯季友奔陳國

人復之傳曰季子來歸是也又曰寓寄也與得用者言寄覲已復還者此解言寄之義也夫物不常用則生蟲蠹故寄於同官令彼得用不使毀敗冀還復用大夫士義皆然也

馬氏晞孟曰君之於臣也在竟則有賜環之禮在他國則有幣召之禮故孔子在陳未嘗不思歸魯孟子去齊未嘗不思反予夫豈悻悻然若小丈夫示其必不復哉此祭器所以必寓也昔微子去殷抱祭器而之周者抱君之祭器也抱已之祭器不可也抱已之祭器猶不可况春秋之時有載祏而行者有載寶而

歸者甚有至於已邑自隨者此君子之所疾也傳曰
臣之祿君實有之義合則進否則奉身而退若孔懼
南宮敬叔孫林父之徒豈知此哉

凡家造祭器為先犧賦為次養器為後無田祿者不設
祭器有田祿者先為祭服君子雖貧不粥祭器雖寒不

衣祭服為宮室不斬於丘木

注大夫稱家謂家始造事犧賦以稅出牲無田祿者

祭器可儉有田祿者祭服宜自有粥賣也丘壘也不粥不衣不斬廣敬也疏家造大夫始造家事也崇敬祖

禰故祭器為先諸侯大夫少牢此言犧謂牛即是天子之大夫祭祀賦斂邑民共出牲牢故曰犧賦養器共養

人之飲食器也自贍為私宜後造有地大夫祭器祭服俱造則先造祭服乃造祭器此言祭器為先者對犧賦養器為先其實在祭服之後也然大夫及士有田祿者乃得造器猶不具唯天子大夫四命以上者得備具若諸侯大夫非四命無田祿則不得造故禮運云大夫祭器不假聲樂皆具非禮也據諸侯大夫言之也若有田祿雖得造祭器必先為祭服後為祭器耳緣人形參差衣服有大小不可假借故宜先造而祭器之品量同官可以共有可暫假也

呂氏大臨曰犧賦亦謂器也犧牲之器如牢互盆簠之屬也賦兵賦也其器如弓矢旗物戈劍之屬也孟子曰唯士無田則亦不祭牲殺器皿衣服不備故也不祭則薦而已與庶人同故不設祭器也有田祿則牲殺器皿衣服皆不可不備祭器所以事其先粥之則無以祭無以祭則不仁也祭服所以接鬼神衣之

則褻褻之不敬也丘木所以庇其宅兆為宮室而斬之是慢其先而濟吾私也是亦不敬也

方氏慤曰以無田祿者不設祭器故禮運以祭器不假為非禮以有田祿者必具祭器故王制以祭器不假為禮此其辨也

表記君子敬則用祭器

注謂朝聘待賓客崇敬不敢用燕器也

曲禮祭服敝則焚之祭器敝則埋之龜策敝則埋之牲

死則埋之

注此皆不欲人褻之也焚之必已不用埋之不知鬼神之所為疏若不焚埋之或用之

為褻慢鬼神之物所以焚之埋之異者服是身著之物故焚之牲器之類並為鬼神之用品雖敗不知鬼神用與不用故埋之埋之猶存焚之則消故焚埋異也

張子曰祭器祭服以其常用於鬼神不敢褻用故有
焚埋之理

禮運大夫具官祭器不假聲樂皆具非禮也

注臣之奢富擬於國

君敗亂之國也孔子謂管仲官事不攝焉得儉
子六卿諸侯三卿卿大夫若有地者則置官一人用兼
攝羣職不得官官各須具足如君也祭器不假者凡大
夫無地則不得造祭器有地雖造而不得具足並須假
借若不假者唯公孤以上得備造故周禮四命受器鄭
云此公之孤始得有祭器者也大夫自有判縣之樂而
不得如三桓舞八佾一曰大夫祭不得用樂者故少牢
饋食無奏樂之文唯君賜乃有之非禮也者若大夫並
為上事則
為非禮也

周氏譜曰以官事不攝與聲樂皆具為非禮則然矣以祭器不假為非禮則誤矣王制曰大夫祭器不假祭器未成不造燕器果大夫祭器猶且假之則燕器蓋未嘗有殆非先王養成德者之義也

郊特牲宗廟之器可用也而不可便其利也所以交於

神明者不可以同於所安樂之義也

疏宗廟之器共事神明不可因便以

為私利

孟子牲殺器皿衣服不備不敢以祭

蕙田案宗廟之器莫重於彝璜尊壺簋簠鼎俎籩豆顧其用之也有漸其陳之也有助所

謂比時具物不可以不備者蓋亦詳矣尊爵
所以陳明水酒醴必先以遂鑑取之以茅涕
之以勺挹之以巾幕覆之如是而可以獻也
簋簋所以陳黍稷必先以饔饔饔之以匕盛
之而後可以薦也若夫牲牢之用則在滌也
有楅衡焉綏焉其牽之也有紉焉其殺而肆
之也有鸞刀焉互焉盆焉簠焉其熟之也有
雍爨焉牛羊豕之鑊焉其載於鼎也有扃焉

冪焉其自鼎而俎也有匕焉畢焉其於鉶也有
有柶以祭焉自鉶而薦也有登焉而後可以
饋也至其進於鬼神又必盥而洗之盥洗槃
匱篚科之設於是先焉鍤鬲甗甑則鑊之屬
也冰鑑所以禦暑也杖咸所以御老也若夫
几席則神之所憑藉也次則尸之所更衣也
此尤其鉅焉者記曰祭者所以追養繼孝也
嘉薦普淖非徒簋簠俎豆為禮器而已今自

几席而下羅而列之為物三十有六於是見孝子之用心矣其他瓢齋概散之屬雖非宗廟所用而為祭祀之所需者亦因以附見從其類也

蕙田案以上通論祭器

周禮春官司几筵掌五几五席之名物辨其用與其位

注五几左右玉彫彤漆素五席莞藻次蒲熊用位所設之席及其處

凡大朝覲大饗射凡封國命諸侯王位設黼依依前南

鄉設莞筵紛純加縹席畫純加次席黼純左右玉几於

依前為王設席左右有几優至尊也鄭司農云紛讀為
幽又讀為和粉之粉謂白繡也純讀為均服之均純緣
也縹讀為藻率之藻次席虎皮為席書顧命曰成王將
崩命太保芮伯畢公等被冕服憑玉几玄謂紛如綬有
文而狹者縹席削蒲弱展之編以五采若今合歡矣畫
謂雲氣也次席桃枝席有次列成文疏司農云紛讀
為幽於義不安故更云又讀為和粉之粉謂白繡也純
讀為均服之均者案僖五年左傳卜偃云均服振振取
號之旂賈服杜君等皆為均均同也但司農讀為均均
即準音與純同故云純緣也云縹讀為藻率之藻者讀
從桓二年臧哀伯云藻率鞞鞞鴈旂纓此並取彼義
也云次席虎皮為席者此見下有熊席故為虎皮後鄭
不從也引尚書者證王憑玉几之義也玄謂紛如綬有
文而狹者此見漢世綬是薄帛有文章而狹以為席之

緣故言之也鄭知縹席削蒲翦展之編以五米若今合歡矣者漢有合歡席如此故還舉漢法況之也云畫為雲氣也者鄭於經但單言畫皆以畫雲氣解之蓋五色雲為之文也云次席桃枝席有次列成文者鄭亦見漢世以桃枝竹為席有次第行列成其文章故言之也

祀先王昨席亦如之

注鄭司農云昨席於主階設席王所坐也玄謂昨讀曰酢謂祭祀及

王受酢之席尸卒食王酌之卒爵祝受之又酌授尸尸酢王於是席王於戶內后諸臣致爵乃設席疏祀先

王謂宗廟六享皆用上三種席酢席謂王酌尸尸酢王王受酢之席亦如上三種席故云亦如之司農云酢席

於主階設席王所坐也者此約鄉飲酒禮主人在阼階賓在戶牖主人受酢王行飲酒禮亦然此酢文承祀先

王下即是祭禮受尸酢不得為凡常飲酒禮故後鄭不從也後鄭知王有受尸酢法者謂若鬯人注引特牲少

牢此注亦取彼義故云尸卒食王醕之卒爵祝受之又酌授尸尸酢王於是席王於戶內也案特牲少牢主人受酢之時未設席夫婦致爵乃設席今王於受酢即設席者優至尊與大夫士禮異知席王在戶內者約特牲主人受酢時在戶內之東西面也云后諸臣致爵乃設席者此亦約特牲夫婦致爵之時有席若然王於酢有席與彼異至於后即與彼同者禮有損之而益故后不得與王同宜同士禮案特牲無致爵於賓長之法而此言諸臣致爵者此王於諸臣亦無致爵禮此致爵謂醕尸訖主人獻賓長於西階之上謂之致爵也特牲主人致爵於主婦席於東房中此亦然其諸臣案特牲獻賓長於西階上無席獻訖以薦俎降降設於西階下亦無席此諸臣有席者亦是王之臣尊

鄭氏鍔曰以書攷之其設席皆以敷重席為言莞筵在地不重者也繅席次席加於筵上蓋皆重焉與莞

僎為五重則與禮記之說合矣天子之席重而為五則下文諸侯之亦重可知

易氏被曰於室中西鄉而受之非南鄉也
專言昨席則無几也所同者席而已矣

諸侯祭祀席蒲筵續純加莞席紛純右彫几

注續畫文也不莞席

加繅者繅柔濡不如莞清堅又於鬼神宜
諸侯禘祫及四時祭祀之席皆二種席也上文畫純者
畫雲氣此云續即非畫雲案續人職對方為續是對方
為次畫於繒帛之上與席為緣也云不莞席加繅者繅
柔濡不如莞清堅又於鬼神宜者案上文天子祭祀席
與酢席同此下文諸侯受酢席下莞上繅今祭祀席下
蒲上莞故鄭以下文決此但今諸侯祭祀席不亦如下
文莞席加繅者以其繅柔濡不如莞清堅於鬼神宜即
於生人不宜故下文生人繅在上為宜也又不以
繅在莞下者繅尊不宜在莞下故用蒲替之也

昨席莞筵紛純加繅席畫純筵國賓於牖前亦如之左

彤几

注昨讀亦曰酢鄭司農云禮記國賓老臣也為布筵席於牖前五謂國賓諸侯來朝孤卿大夫來聘

後言几者使不蒙如也朝者彤几聘者彤几疏諸侯

醕尸醕尸酢主君亦於戶內之東西面設此二席及筵

國賓在牖前亦如之亦如同二種席也几席雖同但上

文鬼神則右几此文生人則左几也又別云左彤几者

謂國賓之中有諸侯來朝亦有孤卿大夫來聘若朝者

則彤几蒙亦如之聘者席雖與同几則用彤故別云左彤

几使不蒙如也先鄭云禮記國賓老臣也者案禮記王

制有四代養國老庶老於學之事彼國者謂卿大夫致

仕庶老謂士之致仕者先鄭據此文而云國賓老臣也

後鄭不從者未見朝聘之賓而言已國老臣於義不可

故不從也玄謂國賓諸侯來朝孤卿大夫來聘者案大

小行人及司儀賓謂諸侯客謂其臣今此經唯云賓而

簾云孤卿大夫者對文賓客異通而言之賓客一也以
大司徒云大賓客令野修道委積小司徒云小賓客令
野修道委積是賓客通用之義也案公食大夫禮云司
空具几與蒲筵加萑席又云上大夫蒲筵加萑席其純
皆如下大夫彼注云謂三命大夫也孤為賓則莞筵紛
純加繅席畫純聘禮將賓宰夫徹几改筵注云徹神几
改神席更布也賓席東上又引公食大夫云云此筵上
下大夫也又引此筵國賓下至彤几云筵孤彤几卿大
夫其漆几與以此而言則筵諸侯與孤用莞筵繅席而
卿大夫則用蒲筵萑席今總云國賓孤卿大夫同莞繅
者此廣解國賓之義其食如公食大夫及聘禮之注也
若然此注云朝者彤几聘者彤几彤几亦謂孤也依彼
聘禮注卿大夫用漆几者以其天子用玉諸侯用彤孤
用彤卿大夫用漆几差次然也案禮記禮器云天子之
席五重諸侯三重今天子唯三重諸侯二重者彼云五
重者據天子大祫祭而言若禘祭祭當四重時祭當三

皆用此三重席耳故此唯見三重席也諸侯三重上公當四重亦謂大祫祭時若禘祭降一重諸侯二重禘與時祭同卿大夫已下特牲少牢唯見一重耳若為賓饗則加重數非常法故不與祭祀同也

王氏詳說曰天子昨席與祭祀席同諸侯昨席與祭祀席異蓋天子至尊可與鬼神同其尊諸臣之昨席用猶天子昨酒用醑齊與鬼神同其尊昨席不同如此然去昨席則蠱與鬼神異其尊昨酒昨席不同如此然去昨席則無人祭祀其

王氏以諸侯左彤几為祭祀之時下筵國賓則不設几曾不知鬼神之几居右人道之几居左如以左彤几以待鬼神則上文之諸侯祭祀右彤几如以左彤几為諸神之所自馮而用於祭祀之間是非所以禮鬼神然則彤几用之於筵賓者正所以待賓也

書顧命牖間南嚮敷重篋席黼純華玉仍几

傳篋桃枝竹白黑雜

繒緣之華彩色華玉以飾憑几仍因也因生時几不改作此見羣臣覲諸侯之坐

西序東嚮敷重底席綴純文貝仍几

傳東西廂謂之序底弱革綴雜彩有

文之貝飾几此旦夕聽事之坐

東序西嚮敷重豐席畫純雕玉仍几

傳豐莞彩色為畫雕刻鏤此養國老

饗羣臣之坐

西夾南嚮敷重筍席玄紛純漆仍几

傳西廂夾室之前筍弱竹玄紛黑綬

此親屬私宴之坐故席几質飾疏牖謂窗也間者窗東戶西戶牖之間也周禮司几筵云凡大朝觀大饗射

凡封國命諸侯王位設黼宸前南向設莞筵紛純加
纁席畫純加次席黼純左右玉几彼所設者即此坐也
又云戶牖之間謂之宸彼言宸前此言牖間即一坐也
彼言次席黼純此言篋席黼純亦一物也周禮天子之
席三重諸侯之席再重則此四坐所言數重席者其席
皆敷三重舉其上席而言重知其下更有席也此牖間
之坐即是周禮宸前之坐篋席之下二重其次是纁席
畫純其下是莞筵紛純也此一坐有周禮可據知其下
二席必然下文三坐禮無其事以宸前一坐敷三重之
席知下三坐必非一重之席敷三重但不知其下二重
是何席耳周禮天子左右几諸侯唯右几此言仍几則
四坐皆左右几也鄭玄云左右有几優至尊也此篋席
與周禮次席一也鄭注彼云次席桃枝席有次列成文
鄭玄不見孔傳亦言是桃枝席則此席用桃枝之竹必
相傳有舊說也鄭注此下則云篋析竹之次青者王肅
云篋席纖弱革席並不知其所據也考工記云白與黑

謂之黼釋器云緣謂之純知黼純是白黑雜繒緣之蓋以白繒黑繒錯雜彩以緣之鄭玄注周禮云斧謂之黼其繡白黑采也以絳帛為質其意以白黑之線縫刺為黼文以緣席其事或當然也華是彩之別名故以為彩色用華玉以飾憑几也鄭玄云華玉五色玉也仍因也釋詁文周禮云凡吉事變几凶事仍几禮之於几有變有仍故特言仍几以見因生時几不改作也此見羣臣覲諸侯之坐周禮之文知之又覲禮天子待諸侯設斧扆於戶牖之間左右几天子衮冕負斧扆彼在朝此在寢為異其牖間之坐則同東西廂謂之序釋宮文孫炎曰堂東西牆所以別序內外也禮注謂蒲席為蒹葦孔以底席為蒹葦當謂蒲為蒲蒹之席也史游急就篇云蒲蒹蒲席蒲蒹謂此也王肅云底席青蒲席也鄭玄云底致也箋織致席也鄭謂此底席亦竹席也凡此重席非有明文可據各自以意說耳綴者連綴諸色席必以絲為緣故以綴為雜彩也見者水蟲取其甲以飾器物

釋魚於貝之下云餘蚨黃白文餘泉白黃文李廵曰貝甲以黃為質白為文彩名為餘蚨貝甲以白為質黃為文彩名為餘泉有文之貝飾兒謂用此餘蚨泉之貝飾兒也此旦夕聽事之坐鄭王亦以為然牖間是見羣臣覲諸侯之坐見于周禮其東序西嚮養國老饗羣臣之坐者紫燕禮云坐於阼階上西嚮則養國老及饗與燕禮同其西序為旦夕聽事之坐夾室之坐燕饗坐後燕飲故西序為旦夕聽事之坐夾室之坐燕饗故夾室為親屬又夾室是隱映之處又親屬輕於燕饗故夾室為親屬私宴之坐案朝士職掌治朝之位王南面此西序東嚮者以此諸坐並陳避牖間南嚮覲諸侯之坐故也王肅說四坐皆與孔同釋草云莞苻籬郭璞曰今之西方人呼蒲為莞用之為席也又云葦鼠莞樊光曰詩云下莞上簟郭璞曰似莞而纖細今蜀中所出莞席是也王肅亦云豐席莞鄭玄云豐席刮凍竹席考工記云畫績之事雜五色是彩色為畫蓋以五彩色畫帛以為緣鄭玄

云似雲氣畫之為緣釋器云玉謂之彫金謂之鏤木謂之刻是彫為刻鏤之類故以刻鏤解彫蓋雜以金玉刻鏤為飾也西廂夾室之前者下傳云西房西夾坐東東房東廂夾室然則房與夾室實同而異名天子之室有左右房房即室也以其夾中央之大室故謂之夾室此坐在西廂夾室之前故繫夾室言之釋草云筍竹萌孫炎曰竹初萌生謂之筍是筍為萌竹取筍竹之皮以為席也紛即組之小別鄭玄周禮注云紛如綬有文而狹者也然則紛綬一物小大異名故傳以玄紛為黑綬鄭於此注云以玄組為之緣周禮大宗伯云以飲食之禮親宗族兄弟鄭玄云親者使之相親人君有食宗族飲酒之禮所以親之也文王世子云族食世降一等是天子有與親屬私宴之事以骨肉情親不事華麗故席几質飾也

儀禮士虞禮素几葦席在西序下

注有几始鬼神也
疏經几席具有注唯

云几者以其大歛奠時已有席至此虞祭乃有几故也
檀弓云虞而立尸有几筵筵則席虞祭始有者以几筵
相將故
藉用葦席疏謂先陳席乃陳黍稷於上
連言筵是所陳席藉薦黍稷也
祝布

席於室中東面右几

注右几於席近南也

士虞禮記尸出執几從席從

注几席素几葦席也以几席從執事也

尸

出門右南面席設於尊西北東面几在南

特牲饋食禮几席陳於西堂

祝筵几於室中東面

注為

神數席也至此使祝接神

少牢饋食禮司宮筵於奧祝設几於筵上右之

注布陳神坐也

室中西南隅謂之奧
席東面近南為右

有司徹司宮筵於戶西南面

注為尸席也

又筵於西序東

面

注為侑席也

禮記禮器鬼神之祭單席

疏鬼神單席神道異人不假多重故單席也

陳氏祥道曰周官之法祀先王之席如朝覲饗射之數而天神之祭則藁鞮而已此言鬼神之祭單席者非周制也

陳氏禮書司几筵之席莫貴於次席而次席黼純書之席莫貴於篋席而篋席亦黼純孔安國以篋席為

桃枝席鄭氏以次席為桃枝席蓋有所傳然也司几筵王筵有莞而無蒲純有黼而無黻諸侯筵有蒲與莞席有莞繅而無次純有黻而無黼則蒲不如莞繅不如紛紛不如畫而斷割之義又王之所獨也司几筵王席三諸侯席二鄉飲鄉射大夫士一而已禮器曰禮有以多為貴者天子之席五重諸侯三重大夫再重郊特牲曰大饗君三重席而酢焉舉重數也司几筵王之朝祀席皆三諸侯祭祀席二禮器曰禮有

以少為貴者鬼神之祭單席非祀廟之禮也司几筵
諸侯筵國賓莞筵紛純加縹席畫純公食大夫蒲筵
常緇布純加萑席尋玄帛純鄭氏釋聘禮謂蒲筵萑
席筵上下大夫也莞筵縹席筵孤也公食大夫大射
賓有加席燕禮之賓無加席鄭氏曰燕禮私臣屈也
筵席之制短不過尋長不過常中者不過九尺公食大夫
蒲筵常萑席尋匠人明堂度九尺之筵純緣之制上不過黼下不過緇
布其卷之也必自末其奉之也如橋衡數必請鄉升

必由下主人敬客則請為席客敬主人則徹重席侍
所尊者敬無餘席為人子者坐不中席食坐則前席
虛坐則後席有憂者側席有喪者專席此禮之大畧
然也司几筵大朝覲大饗射凡封國命諸侯祀先王
無異席則祀先公亦用之矣賈公彥釋禮器謂天子
大袷席五重禘祭四重時祭三重上公大袷四重諸
侯大袷三重禘與時祭同二重其言無所經見然書
皆言敷重席毛氏釋詩亦曰設重席則王之次席繅

席皆重焉與莞筵而五諸侯繅席亦重焉與蒲筵而三其數適與禮器合矣

周禮天官冢宰享先王亦如之贊玉几

注玉几所以依神天子左右玉

几疏不云大者欲見宗廟六享同然云天子左右玉几者此是司几筵文彼所云者謂王受諸侯朝覲會同所設今此享先王鬼神之几亦與天子平生同故引為證

儀禮有司徹主人西面左手執几縮之以右袂推拂几三二手橫執几進授尸於筵前尸進二手受於手間主人退尸還几縮之右手執外廉北面奠於筵上左之南

縮不坐

注衣袖謂之袂拂去外拂之也推拂去塵示新受從手間諫也左之者異於鬼神生人陽長左

鬼神陰長右不坐奠之者几輕

卒養 右几

周禮春官司几筵凡吉事變几

注吉事王祭宗廟祿於室饋食於堂繹於祊每

事易几神事

文示新之也

禮記祭統鋪筵設同几為依神也

注同之言詞也祭者以其妃配亦不特几

也疏詞共也人生時形體異故夫婦別凡死則魄氣

同歸於此故夫婦共几鄭注以某妃配儀禮少牢文謂

祭夫祝辭不但特設辭亦不特設其几祝辭與几皆

同於夫也故鄭注司几筵云祭於廟同几精氣合也席

亦共之必云同几者筵席既長几

則短小恐其各設故云同几也

張子曰鋪筵設同几疑左右几一云交鬼神異於人
故夫婦而同几又曰鋪筵設同几只設一位以其精
神合也後又見合葬孔子善之知道有此義然不知
一人數娶設同几之道又何如此未易處

陳氏樂書曰人道則貴別神道則貴親故葬則同穴
而祭則同几也同几所以依神

陳氏禮書周禮司几筵五几莫貴於玉書之四几莫
貴於華玉几則玉几者華玉几也王設几於左右優

至尊也諸侯而下或設之左或設之右適事之宜也
諸侯祭祀席右几筵國賓左几則祭祀陰事也故右
之筵國賓陽事也故左之士虞禮布席於室中東面
右几少牢祝設几於筵上右之有司徹尸奠几於筵
上左之卒養而厭祭設右几鄭氏謂生人陽長左鬼
神陰長右是也然鬼神雖長右而長右不必皆鬼神
故甸後亦右几以甸後陰事故也鄭氏以甸後右几
為貉祭然經言甸後而不言甸後之祭鄭氏之說其

果然乎司几筵吉事變几凶事尚質而几常仍故也

孔安國以書之仍几為因生時之几不改作誤矣詩

曰肆筵設席授几有緝御昏禮主人拂几授校

校几足

聘禮宰夫奉兩端以進公於序端受宰几攝之

一手受之

以授賓賓進訝受

賓以兩手於几兩端執之

有司徹主人降受宰

几二手橫執以授尸尸二手橫於手間則席常設於

賓未至之前几常授於行禮之際其將授也必拂

曲禮

曰進几杖者拂之士昏禮主人拂几鄭氏曰外拂之也聘禮公東南鄉外拂几三宰內拂几三蓋於敵以

下外拂於尊者
內拂皆拂之三

其授之或受其足或受於手間其避

拜送也或以几辟

昏聘禮皆以几有
辟者以賓卑故也

或不以几辟

有司

徹不云以几
辟者尊尸也

其敬父母不傳

內則父母
枕几不傳

其謀於長者

必操以從是皆稱情以為文故也禮王大朝覲大饗

射凡封國命諸侯祀先王酢席皆玉几諸侯祭祀彫

几酢席筵國賓彤几凡甸後漆几鄭氏謂諸侯朝者

彫几聘者彤几聘者孤彤几卿大夫其漆几歟然禮

於祭祀言彤几而朝者不與於國賓言彤几則無間

於孤卿大夫不知鄭氏何據云然邪馬融曰几長三尺阮謚曰几長五尺高二尺舊圖几兩端赤中央黑蓋各述其所傳然也覲禮天子設斧扆左右玉几司几筵大朝覲大饗射封國命諸侯王位設黼依左右玉几几所憑以安者也王於朝覲會同立而不坐禮曲

曰天子當依而立曰覲當宁而立曰朝明堂位曰天子負斧扆而立非有所憑也然必

設几者鄭氏釋太宰謂立而設几優至尊也荀卿曰周公負扆而坐諸侯趨走堂下得非所傳聞者異歟

儀禮昏聘公食大夫皆有几冠禮醴賓鄉飲酒鄉射及燕賓無几皆輕重之別也喪或同時在殯則每敦

異几

鄭氏曰敦讀曰燾燾覆也

及祭則同几生事鬼事之別也几

不特施於行禮而已燕居亦有焉士喪禮所謂燕几是也不特施於燕居而已田役軍旅亦有焉周禮甸

後右漆几春秋之時智伯在軍投之以几是也

晉伐偏陽

城荀偃士句請班師智伯怒投之以几出於其間

不特所憑以安而已死者

用之拘足尸與嫁者或用以乘車士喪禮綴足用燕

几曲禮尸必式乘必以几昏禮婦乘以几是也

蕙田案以上几席

周禮天官幕人祭祀共其帷幕幄帟綬

注共之者掌次當以張疏供

與掌次使張之

掌次凡祭祀張尸次

注尸則有幄鄭司農云尸次祭祀之尸所居更衣帳疏尸尊故別

張尸次司農云更衣帳者未祭則常服至祭所乃更去常服服祭服也

陳氏禮書掌次凡祭祀張其旅幕張尸次鄭氏曰旅

衆也公卿以下即位所祭祀之門外以待事為之張

大幕尸則有幄考之幕人祭祀共其帷幕幄帟綬帷設於旁幕設於上幄則四合如屋者也帟則平帳承塵者也掌次於旅言幕於尸言次則次不得用幕而已鄭氏謂尸則有幄是也特牲禮迎尸於門外尸入門左少牢禮祝出迎尸於廟門外祝先入門右尸入門左則次設於西塾矣尸次設於西塾則旅幕設東塾矣

蕙田案以上尸次

秋官司烜氏掌以夫遂取明火於日以鑒取明水於月以共祭祀之明盥明燭共明水

陳氏禮書淮南子曰陽燧見日則然而為火方諸見月則津而為水王充論衡曰陽燧取火於日方諸取水於月相去甚遠而火至水來者氣感之也鄭司農釋周禮謂夫發聲鄭康成謂夫遂陽遂也鑑鏡屬世謂之方諸然則鑒金為之則夫遂亦金矣內則以夫遂為金遂是也鑒之體方則夫遂圓矣世謂鑒為方

諸是也蓋離者陽中之陰於物為火坎者陰中之陽於物為水以金遂取火則以陽召陰以方諸取水則以陰召陽以陽召陰夫道也故謂之夫夫能遂事故謂之遂夫遂以義言鑒以體言於取火言夫遂於取水言鑒互相備也高誘曰方諸陰燧大蛤也熟摩向月則水生以銅盤受之下水數石觀漢之飲酎夕牲以鑒諸取水於月以陽燧取火於日

漢書儀

唐之李恭

真嘗八月中取蛤尺二寸試之得水數斗

劉氏唐志則

取水亦以大蛤矣或謂之方諸蓋其類也莊子曰木
與木相摩則然文子曰木中有火不鑽不發故四時
變國火者春取榆柳夏取棗杏季夏取桑柘秋取柞
櫟冬取槐檀而木燧取火蓋不必然先儒謂晴則取
火以金燧陰則取火以木燧然金燧以取明火特施
於致嚴之時而已則凡取火皆木燧耳孰謂木燧有
間於陰晴耶

蕙田案以上夫遂鑑

易大過初六藉用白茅无咎

繫辭藉用白茅无咎子曰苟錯諸地而可矣藉之用茅何咎之有慎之至也

書禹貢包匭菁茅

注匭匣也茅以縮酒

蔡傳菁茅所以共祭祀縮酒之用而又匣之所以示敬也

周禮天官甸師祭祀共蕭茅

注鄭大夫云蕭字或為蒿讀為縮束茅立之祭前沃

酒其上酒滲下去若神飲之故謂之縮杜子春讀為蕭蕭香蒿也玄謂詩所云取蕭祭脂郊特牲云蕭合黍稷

臭陽達於牆屋故既薦然後燐蕭合馨香合馨香者是蕭之謂也茅以共祭之苴亦以縮酒苴以藉祭縮酒泝酒也醴齊縮酌

地官鄉師大祭祀

共茅菹

注杜子春云菹當為菹以茅為菹若葵菹也鄭大夫

讀菹為藉謂祭前藉也玄謂菹士虞禮所謂苴刈茅長五寸束之者是也祝設於几東席上命佐食取黍稷祭於苴三取膚祭祭如初此所以承祭既祭蓋束而去之

春官司巫祭祀共菹館

注杜子春云菹讀為鉏鉏藉也館神所館止也玄謂菹之言藉

也祭食當有藉者館所以承菹謂若今筐也士虞禮曰苴刈茅長五寸實於筐饌於西站上又曰祝盥取苴降洗之升入設於几東席上東縮

男巫掌望祀望衍授號旁招以茅

注旁招以茅招四方之所望祭者

禮記郊特牲縮酌用茅明酌也

注謂沛醴齊以明酌也周禮曰醴齊縮酌五齊

醴尤濁和之以明酌藉之以茅縮之以茅縮去滓也明酌者事酒之上也名曰明者事酒令之醴酒皆新成也春秋傳曰爾貢包茅不入王祭不共沛以酌酒酌猶斟也酒已沛則斟之以實尊彝昏禮曰酌玄酒三注於尊凡行酒亦為酌也

儀禮士虞禮苴刊茅長五寸束之實於筐

注苴猶藉也

祝

盥升取苴降洗之升入設於几東席上東縮左食

取黍稷祭於苴三

注苴所以藉祭也孝子始將納尸以事其親為神疑於其位設苴以定之

耳或曰苴主道也則特牲
少牢當有主象而無可乎

士虞禮記既饗祭於苴

春秋僖公四年左氏傳齊侯以諸侯之師伐楚曰爾貢
包茅不入王祭不共無以縮酒

陳氏禮書茅之為物柔順潔白可以施於禮者也故
古者藉祭縮酒之類皆用焉禹貢荊州包匭菁茅甸
師祭祀共蕭茅鄉師大祭祀共茅菹司巫祭祀共菹
館則茅有貢於方國者有共於甸師者甸師之茅有

入之鄉師有入之司巫則鄉師之所共者大祭祀也

司巫之所共者凡祭祀也

賈公彥曰甸師共茅與司巫司巫為苴以共之此據

祭宗廟也甸師氏送茅與鄉師謂祭天也

孔子曰苟錯諸地而可矣藉之

用茅何咎之有則茅不特藉祭而已士虞禮苴刈茅

長五寸束之實於筐饌於西坵上祝升取苴降洗之

升入設於几東席上東縮佐食取黍稷祭於苴三取

膚祭祭如初此特藉祭者也司尊彝醴齊縮酌記曰

縮酌用茅明酌也縮然後酌則其縮不必束而立之

祭前鄭大夫謂東而立之祭前沃酒其上酒滲而下
若神飲鄭康成謂將納尸以事其親為神疑於其位
故設苴以定之其說皆不可考男巫望祀望衍旁招
以茅國語置茅絕設表望公羊曰鄭伯左執茅旌何
休謂斷之曰藉不斷曰旌宗廟之中以迎道神指護
祭者然則茅之所用豈一端哉故可以罍鼎可以御
柩雜記或菹之以為豆實或包以通問好或索綯以
備民用此茅所以可重也士虞有苴特牲少牢吉祭

無苴而司巫祭祀共菹館則凡王祭祀有苴矣賈公彥謂天子諸侯尊者禮備於理或然後世祭有翟蓋茅旌之類

蕙田案以上蕭茅

周禮天官冢人祭祀以疏布巾冢八尊

注以疏布者天地之神尚質

以畫布巾冢六彛

注宗廟可以文畫者畫其雲氣與疏此六彛皆盛鬱鬯以畫布冢之故

云畫布冢六彛此舉六彛對上經八尊無鬱鬯以言宗廟有鬱鬯其實天地亦有秬鬯之彛用疏布宗廟亦有

八尊亦用畫布互舉以明義也

凡王巾皆黼

注四飲三酒皆畫黼周尚武其用文德則黻可

儀禮士虞禮冪用絺布

注絺布葛屬疏絺布葛屬者絺以葛為之布則以麻為之

今絺布並言則此麻葛雜故有兩號是以鄭云葛屬也

特牲饋食禮記冪用綌

注冪用綌以其堅潔

籩巾以綌也纁裏

注籩有巾者果實之物多皮核優尊者可燕裏之也舊說云纁裏者皆

被

有司徹乃設局霤

禮記禮運疏布以冪

注冪覆尊也疏布謂粗布

陳氏禮書周官冢人祭祀以疏布巾冢八尊以畫布巾冢六爨蓋八尊以獻及於天地故巾疏而不畫六爨以裸施於宗廟故巾畫而不疏冢人言疏布巾則畫用精者可知言畫布巾則疏之不畫可知巾以覆為用象天之體畫必以黼天事武也鄭氏曰周尚武畫黼其用文德則黻可又曰畫者畫其雲氣歟此皆不可考也燕禮公尊冢用綌若錫大射冢用錫若綌士喪冢用功布士虞冢用絺鄉飲酒士昏特牲冢皆

周綌

少牢合尊皆有綌蓋亦用綌以鄉飲酒知之

蓋人君尊也故燕與大

射之綌用葛若錫冬夏異也人臣卑也故鄉飲昏喪祭之綌用葛而已冬夏同也然士冠禮禮賓贊禮禮婦聘禮禮賓皆用醴而無綌以醴質故也醯用酒亦無綌從禮子之質故也燕禮君尊有綌方壺圓壺無綌卑屈於尊故也昏禮尊於室內有綌尊於房戶外無綌賤屈於貴故也若無鄉飲與射則無所屈焉故皆有綌大射之禮綌綴諸箭則異於他綌矣

又曰特牲籩中以綌纁裹士昏醢醬二豆菹醢四豆
兼巾之士喪籩豆用布巾士婚笄緇被纁裏聘禮竹
簋方玄被纁裏有司徹簋有蓋冪然則冪巾不特施
於尊彝而已簋籩籩豆皆有之也冪人凡王巾皆黼
則諸侯大夫士之中不畫黼矣

蕙田案以上巾冪

明堂位其勺夏后氏以龍勺殷以疏勺周以蒲勺

注龍頭

也疏通刻其頭蒲合蒲如鳬頭也疏夏后氏以龍勺
者勺為龍頭殷以疏勺者疏謂刻鏤通刻勺頭周以蒲

勺者皇氏云蒲謂合蒲當刻勺為鳧頭其口微開如蒲草本合而未微開也

周禮考工記梓人為飲器勺一升

注勺尊升也

儀禮士虞禮加勺南枋

特牲饋食禮尊兩壺於阼階東加勺南枋西方亦如之

注為酬賓

及兄弟

少牢饋食禮司宮取二勺於篚洗之兼執以升

陳氏禮書彙巾以畫布而勺有飾明堂位曰灌尊龍勺疏勺蒲勺是也尊巾以疏布而勺無飾禮記曰犧

尊禪勺以素為貴是也禪白理木也與喪士素勺異
矣龍勺刻之以龍也疏勺刻而疏之也蒲勺刻之以
蒲也疏勺蓋與疏七疏屏疏渠眉之象同蒲勺蓋與
蒲壁之象同龍水畜也疏水道也蒲水物也勺所以
斗齊酒明水故其飾如此考工記曰梓人為飲器勺
一升爵一升儀禮加勺於尊皆南枋則勺者北面也
每尊皆加勺則尊不共勺也鄭康成曰蒲勺如鳧頭
不可考也

蕙田案以上句

儀禮士虞禮水在洗西篚在東 苴刈茅長五寸束之

實於篚 從者錯篚於尸左席上 尸飯播餘於篚

三飯佐食舉幹尸受振祭嚼之實於篚 佐食舉魚腊

實於篚 佐食受肺脊實於篚 主人答拜受爵出實

於篚 從者奉篚

特牲饋食禮主人答拜受角降反於篚 卒爵降實爵

於篚 卒受者實解於篚 降實散於篚

少牢饋食禮解實於篚

陳氏禮書詩序曰實幣帛篚篚禹貢厥篚玄纁而織
文絲縞之類皆以篚儀禮壘洗之西皆有篚又有上
篚下篚膳篚之辨則上篚在堂下篚在庭膳篚特饌
君爵而已篚之為物可以盛幣帛可以盛勺解可以
盛苴茅士虞苴刳茅長五寸束之實於篚可以代胙俎士虞佐食受肺脊實於篚
可以實黍稷肆師大朝覲佐饋共設篚壘此篚之實
黍者也公食大夫豆實實於壘簋實實於篚而篚者

筐類也其用以實簋實宜矣鄭氏曰筐其筐字之誤歟不必然也鄭氏又曰筐竹器如苓說文曰筐如竹篋篋有益是以舊圖筐亦有益

蕙田案以上筐

士虞禮設洗於西階西南

士冠禮注洗承盥洗者棄水器也士用鐵疏盥手洗爵

之時恐水穢地以洗承盥洗水而棄之故云棄水器云士用鐵者衆漢禮器制度洗之所用士用鐵大夫用銅諸侯用白銀天子用黃金也

水在洗西

士冠禮注水器尊卑皆用金壘其大小異疏云水

器尊卑皆用金壘及大小異者此亦案漢禮器制度尊卑皆用金壘及其大小異此篇與昏禮鄉飲酒鄉射特

牲皆直言水不言蠶大射惟云蠶水不云料少牢云司官設蠶水于洗東有料鄭注云設水用蠶沃盥用料禮在此也欲見蠶料俱有餘

匱水錯於槃中南流在西階

之南

注流匱吐水口也

簞巾在其東

士虞禮記淳尸盥執槃西面執匱東面執巾者在其北

東面宗人授巾南面

注槃以盛棄水為淺汙人也

特牲饋食禮設洗於阼階東南

特牲饋食禮設洗南北以堂深東西當東榮

注榮屋翼也

水在洗東

注祖天地之左海

特牲饋食禮尸盥匱水實於槃中簞巾在門內之右

注設

盥水及巾尸尊不就洗又不揮門內之右象洗在東

少牢饋食禮司宮設蠶水於洗東有枓設篚於洗西南

肆

注枓枓水器也凡設水用蠶沃盥用枓禮在此也疏云凡設水用蠶沃盥用枓禮在此也者言凡總儀

禮一部內用水者皆須蠶盛之沃盥水者皆用枓為之鄭言禮在此者以士冠禮直言水在洗東士昏禮亦直言水在洗東鄉飲酒特牲記亦云然皆不言蠶器亦不言有枓其燕禮大射雖云蠶水又不言有枓故鄭云凡此等設水用蠶沃盥用枓其禮具在此故餘文不具省文之義也

小祝設槃匱與簞

巾於西階東

注為尸將盥

宗人奉槃東面於庭南一宗人

奉匱水西面於槃東一宗人奉簞巾南面於槃北乃沃

尸

注庭南沒霤疏庭南者於庭近南是沒盡門屋霤近門而盥也是以持牲亦云尸入門北面盥繼門而

言即亦沒

霤者也

陳氏禮書盛水者壘也斟水者料也盛棄水者洗也
天子諸侯之屋四注故洗當東霤大夫士之屋兩下
故洗當東榮水在洗東祖左海也南北以堂深則遠
近也公食大夫鄉飲鄉射言洗與水而不及壘大射
燕禮言壘水而不及料少牢兼言壘水有料互相備

矣故鄭氏於少牢言凡設水用蠶沃盥用枓禮在此也洗皆在東階士虞設於西階西南反吉禮也篚皆在洗西士虞篚在洗東以洗在西階也然蠶洗者臣下之所就熟耳若人君與尸則有槃匱焉公食大夫小臣具槃匱在東堂下士虞匱水錯於槃中南流特牲尸盥匱水實於槃中少牢小祝設槃匱蓋人君與尸尊不就洗故設槃匱則匱之用猶蠶水也槃之用猶洗

開元禮皇帝皇后行事有槃匱亞獻以下及攝事者無之亦君尊不就洗之義

士喪設

盆盥於饌東則奠禮未用罍洗歟

蕙田案以上罍洗科繁匝

詩小雅楚茨執爨踖踖

傳爨爨爨也踖踖言爨竈有容也疏傳正義曰以祭祀

之禮爨爨以煮肉廩爨以炊米此言臣各有司故兼二爨也少牢云雍人概鼎七俎于饗爨爨爨在門東南北上廩人概甑七與敦于廩爨爨在饗爨之北故知有二焉踖踖爨竈有容者謂執爨之有容儀也

何氏楷曰爨賈公彥云今之竈也周公制禮之時謂之爨至孔子時則謂之竈案少牢禮有饗爨有廩爨雍爨以炙肉雍人掌之廩爨以炊米廩人掌之特牲

禮有牲爨有魚腊爨即雍爨也然無廩爨而有饔爨
主婦視之舊說炊黍稷曰饔饔廩所爨同物而比饔
為大則行禮之人異耳此詩言為俎言燔炙則所執
者乃雍爨也踏說文云長脰行也重言踏踏爾雅云
敏也

周禮天官亨人職外內饗之爨亨者

注職主也爨今之
竈主於其竈煮物

也

儀禮士虞禮魚腊爨亞之北上

注爨
竈

饔爨在東壁西

面

注炊黍稷曰饎饎北上上齊於屋宇於虞有亨饎之饗彌吉

特牲饋食禮記主婦視饎饗於西堂下

注炊黍稷曰饎宗婦為之饗

也西堂下者堂之西下也近西壁南齊於坵古文饎作糒周禮作饎

牲饗在廟門外東

南魚腊饗在其南皆西面饎饗在西壁

注饎炊也西壁堂之西墻下

少牢饋食禮雍饗在門東南北上

注饗饗也在門東南統於主人北上羊豕

魚腊皆有竈竈西有鑊凡概者皆陳之而後告絜疏云凡概者皆陳之而後告絜者絜特牲視濯時皆陳之

視訖告絜此亦當然

廩饗在饗饗之北

禮記禮器燔柴於奧

注奧當為饗字之誤也或作竈禮尸卒食而祭饎饗饗饗也時人以

為祭火神
乃燔柴

蕙田案以上爨

周禮天官亨人掌共鼎鑊

注鑊所以煮肉及魚腊之器疏云鑊所以煮肉及魚腊

之器者案少牢爨在廟門外之東大夫五鼎羊豕腸胃魚腊各異鑊鑊別有一鼎鑊中肉孰各介一鼎

春官大宗伯省牲鑊

注鑊烹牲器也疏案特牲少牢鑊即爨在廟門之外東壁也

小宗伯大祭祀省鑊

注省鑊視烹腥熟疏案禮運云腥其俎熟其敝鄭云腥其俎豚解

而腥之熟其敝體解而燭之此謂祭宗廟朝踐饋食節彼下文更有體其犬豕牛羊謂室中饋熟亦須鑊鄭不

言畧也

秋官小司寇凡禋祀五帝實鑊水

注其時鑊水當以洗解牲體肉

士師祀五帝則沃尸及王盥洎鑊水

注洎謂增其沃汁

儀禮少牢饋食禮三鼎在羊鑊之西二鼎在豕鑊之西

注

脂從羊膚從豕統於牲

疏云魚脂從羊膚從豕者上文概鼎時鄭云羊豕魚脂皆有龜令陳鼎宜各當其鑊

此三鼎在羊鑊之西二鼎在豕鑊之西故云魚脂從羊膚從豕也其實羊豕魚脂各有鑊也此直有羊豕前注言皆有龜可知魚脂皆有龜案士虞禮側亨於門外之右東面魚脂饔亞之北上士之魚脂皆有饔則大夫魚脂皆有鑊可知故羊豕魚脂皆有龜也

爾雅附耳外謂之鈇

注鼎耳在表

欵足者謂之鬲

注鼎曲脚也者名鼎體圓飲上而小口者名鼎詩周

疏此別鼎名也鼎最大

頌云鼎鼎及鼎附耳在鼎表者名欵欵濶也謂鼎足相去踈濶者名鬲

鬲謂之鬻

注詩曰漑之釜鬻

鬻鈔也

注涼州呼鈔甑自關而東或謂之甑或謂之酢餹

疏鬲一名鬻涼州名鈔方言云

是也注詩曰漑之釜鬻檜風匪風篇文也

詩召南采蘋予以盛之維筐及筥予以湘之維錡及釜

傳方曰筐圓曰筥湘亨也錡釜屬有足曰錡無足曰釜

箋云亨蘋藻者于魚漑之中是銅羹之芼

疏方曰

筐圓曰筥有足曰錡無足曰釜此皆爾雅無文傳以當時驗之以錡與釜連文故知釜屬說文曰江淮之間謂

釜曰錡定本有足曰錡下更無傳俗本錡下又云無足曰釜少牢禮用羊豕也經云上利執羊俎下利執豕俎下乃云上佐食羞兩銅取一羊銅於房中下佐食又取一豕銅於房中皆芼注云芼菜也羊用苦豕用薇皆有滑牲體在俎下乃設羊銅豕銅云皆芼煮于所亨之湑始盛之銅器也故特牲注云銅肉味之有菜和者今教成祭牲用魚芼之以蘋藻則魚體亦在俎蘋藻亨于魚湑之中矣故鄭云魚為俎實蘋藻為羹菜以準少牢之禮故知在銅中為銅羹之芼知非大羹盛在鐙者以大羹不和貴其質也此有菜和不得為大羹矣魯頌曰毛炰載羹傳曰羹大羹銅羹也以經單言羹故得兼二也特牲禮云設大羹湑于醢北注云大羹湑煮肉汁則湑也

何氏楷曰受物曰盛盛之湘之莫之皆謂蘋藻也筐

筥皆竹器筥說文本作匡徐鍇云受物之器象形正
三方也筥說文云箱也陳祥道云宋魏之間謂箸筥
為筥則其制圓而長矣或作簾方言云江沔之間謂
之簾南楚謂之簾自關而西秦晉之間謂之簾亦作
簾月令曲植簾筐是也湘之訓烹似無其義韓詩作
鬻說文本作蕭漢志鬻享上帝史記武紀禹鑄九鼎
皆嘗鬻烹顏師古云鬻烹一也古人音同者字得通
用許慎云江淮之間謂釜曰錡陸德明曰三足釜也

毛傳云無足曰釜古作𩰇鄭玄云烹蘋藻者於魚涪之中是鉶羹之芼又曰魚為俎實蘋藻為羹菜案涪汁也鉶盛和羹器凡肉味之有菜和者則以鉶盛之故謂之鉶羹芼者用菜雜肉為羹之名先將蘋藻烹於魚汁之中始盛之鉶器所謂芼以蘋藻者也

陳氏禮書周禮亨人共鼎鑊以給水火之齊小宗伯祭之日逆齋省鑊小司寇禋祀五帝實鑊水士師祀五帝洎鑊水少牢饗人陳三鼎在羊鑊之西二鼎在

豕鑊之西詩傳曰有足曰錡無足曰釜又曰鬲釜屬
說文曰江淮之間謂釜曰錡又曰鑊鑊也鑊釜大口
者又曰朝鮮謂釜曰鉶鬻大釜也一曰鼎上大下小
若甑曰鬻爾雅曰竅足謂之鬲蓋鑊也鑊也釜也鬻
也錡也鬲也鉶也鑊也皆烹飪之器也錡有足者也
鬲空足者也鬻大釜也鑊釜口大者也詩以錡釜湘
菜以釜鬻烹魚周禮儀禮以鑊烹牲則鑊又大於釜
矣

儀禮少牢饋食禮廩人概甒甒

注廩人掌米入之藏者甒如甒一孔古文甒為

𩰫

周禮考工記陶人陶人為甒實二鬴厚半寸脣寸

注量六斗

四升曰鬴鄭司農云甒無底甒

盆實二鬴厚半寸脣寸

甒實二鬴厚半寸脣寸七穿

陳氏禮書少牢禮雍人概鼎七廩人概甒甒爾雅甒

謂之鬻鬻鎡也孫炎曰關東謂甒為鬻涼州謂甒為

鈔方言曰自關而東或謂之甌或謂之鬯或謂之酢
鎡甌陶器也春秋之時齊有玉甌則其所以寶者也
鬯大釜也毛氏許慎以鬯為釜屬而爾雅方言以鬯
為甌則其名同者也考工記豆實三而成轂則轂之
所容斗二升矣庾實二轂則二斗四升也聘禮十六
斗曰庾申豐曰粟五十庾杜預亦曰庾十六斗
昭二
十六
年則庾固有大小者也鄭司農曰甌無底甌鄭康成
釋儀禮曰甌如甌一孔蓋無底則一孔而已實菹醢

者豆而量容四升亦曰豆容六升謂之庾而容二斗
四升亦謂之庾有臂謂之釜而無足亦謂之釜則釜
屬謂之鬻鬻亦謂鬻可也謂鼎上天下小若鬻曰鬻
則鬻非特名鬻而已

蕙田案以上鑊鬻

詩大雅生民于豆于登

傳豆薦菹醢也登大羹也疏公食大夫禮云大羹湆不和實

于登是登為大羹湆者肉汁太古之羹也不調以鹽菜以質故以瓦器盛之

爾雅釋器瓦豆謂之登

疏對文則木曰豆瓦曰登散則皆名豆故云瓦豆謂之登冬官

旒人掌為瓦器而云豆中縣鄭云
縣繩正豆之柄是瓦亦名豆也

陳氏禮書登瓦器也儀禮作鐙則登亦金為之其實
大羹食禮用之飲酒不用故公食大夫設於醬西鄉
飲鄉射燕禮不設也士虞特牲有司徹皆設之少牢
不言設者以特牲有司徹見之也

蕙田案以上登

詩小雅大東有求棘匕

傳求長貌匕所以載鼎實棘赤心也疏求為匕之狀故知長

貌雜記云匕用桑長三尺是也鼎實煮肉也煮肉必實之於鼎必載之者以古之祭祀享食必體解其肉之胖

既大故須以匕載之載謂出之於鼎升之於俎也雜記注亦言匕所以載牲體牲體即鼎實也言棘赤心者以棘木赤心言於祭祀賓客皆赤心盡誠也吉禮用棘雜記言用桑者謂喪祭也待賓客之匕禮當用棘傳言赤心解本用棘之意未必取赤心為喻

儀禮特牲饋食禮記棘心七刻

注刻若今龍頭

少牢饋食禮雍人概鼎匕

注凡概者皆陳之而後告絜

廩人概甑

甑匕

注匕所以匕黍稷者也者上雍人云匕者所以匕肉此廩人所掌米故云

匕黍稷也

鼎序入雍正執一匕以從雍府執四匕以從

匕皆加於鼎東枋

有司徹陳鼎如初雍正執一匕以從雍府執二匕以從

匕皆加於鼎東枋

注雍正羣吏掌辨體名肉物者府其屬凡三匕鼎一匕

雍

人覆二疏匕於其上皆縮俎西枋

注疏匕匕柄有刻飾者

司馬

在羊鼎之東二手執挑匕枋以挹湑注於疏匕若是者三

注挑謂之軟讀如或春或枕之枕字或作挑者秦人語也此二匕者皆有淺升狀如飯操挑長枋可以抒物於器中者注猶瀉也今文挑作挑挹皆為挹

陳氏禮書雜記云北以桑長三尺或曰五尺易曰不

喪匕鬯詩曰有捄棘匕特牲禮棘心匕刻少牢饋食

禮雍人概鼎匕俎于雍饔廩人概甑鬩匕與敦於廩
饔有司徹司馬以二手執挑匕枋以挹渚注於疏匕
若是者三又云雍正雍府加匕於鼎東枋雍人覆二
疏匕於俎上蓋匕之別有四有黍稷之匕有牲體之
匕有疏匕有喪匕三匕以棘喪匕以桑廩人之所概
黍稷之匕也雍人之所概牲體之匕也牲體之匕挑
匕也其制則黍稷之匕小於挑匕挑匕小於疏匕何
則敦之量不過三豆而高不過一尺則黍稷之匕小

矣挹之以挑匕然後注於疏匕者三則疏匕大矣詩
於角弓兕觥皆言其觶於天畢與匕皆言有挾則匕
之制非挺然也儀禮或作杞或作匕所謂執匕概匕
取匕加匕覆匕自匕言之也所謂杞魚杞者乃杞長
杞卒杞自用匕言之也特牲少牢有司徹公食昏禮
舉鼎執匕俎皆異其人士喪禮執匕執俎皆舉鼎者
為之吉禮尚文喪禮尚畧故也特牲右人於鼎北匕
肉左人於鼎西載諸俎士虞禮則右人載者以吉禮

尚右喪禮尚左故也

儀禮少牢饋食禮上佐食羞兩鉶 皆有柶尸扱以柶

陳氏禮書說文曰柶匕也鄭氏曰柶如匕士冠士昏

醴柶皆用角士喪禮醴柶皆用木以木質於角故也

士喪東方之饌用木柶 既夕厥明奠用木柶 王府大喪共角柶士喪楔齒

用角柶以角貴於木故也柶施於醴亦施於鉶公食

大夫少牢饋食鉶柶不言其材蓋亦角為之歟其制

則先儒以為枋長尺欒博三寸醴柶之欒淺鉶柶之

櫨深理或然也。柶之所用，有多有寡。授柶之禮，有面枋、有面葉。公食大夫，設柶、鉶，而柶、鉶上鉶少牢羞二。鉶皆有柶，蓋仁於賓者，以同為樂，仁於神者，以異為敬。故也。冠禮贊者既酌面葉，以授賓；賓面枋，以授冠者；冠者面葉，以授祭昏。禮贊者既酌面葉，以授主人。主人面枋，以授賓；賓亦面葉，以授祭聘。禮宰夫既酌面枋，以授公；公面枋，以授賓；而授公不面葉，蓋冠之賓昏之主人，必訝受，而公不訝受，故也。

特牲饋食禮宗人執畢入當阼階南面

注畢狀如又蓋為其似畢星取

名也主人親舉宗人則執畢導之既錯又以畢臨也載備失脫也雜記曰北用桑長三尺畢用桑長三尺利其本於末祀畢同材明矣今此北用棘心則畢亦用棘心舊說云畢似御他神物神物惡桑又則少牢饋食及虞無又何哉此無又者乃主人不親舉耳少牢大夫祭不親舉虞喪祭也主人未執事祔練祥執事用桑又自此純吉用棘心又疏云畢狀如又者下引舊說有他神物惡桑又之言故以又而言云蓋為其似畢星取名焉者案詩云有捋天畢載施之行無正文故云蓋以疑之也云主人親舉宗人則執畢導之既錯又以畢臨也載備失脫也知必然者以經言宗人執畢先入是導之也又知既錯又以畢臨也載備失脫也者以經云當阼階南面明鄉主人執畢臨也備失脫可知也云今此北用棘心則畢亦用棘心者案下記云棘心也刻是也知畢

亦棘心者以雜記也畢同用桑據喪祭今吉祭也用棘心則畢亦用棘心也云附練祥執事用桑又者以其虞時主人不執事則附以執事用桑又則雜記所云畢也云自此純吉用棘心又者除祥後則禫月及吉祭用棘心也案易震卦彖辭云震來虩虩笑言哑哑震驚百里不喪匕鬯鄭注云雷發聲於百里古者諸侯象諸侯出教令能警戒國內則守其宗廟社稷為之祭主不亡其匕鬯人君於祭也牲體薦鬯而已其餘不親為也若然諸侯親也牲體大夫不親者辟人君士卑不嫌得與人君同親也

陳氏禮書爾雅曰濁謂之畢濁畋器也

郭氏曰掩兔之畢

畋

器曰畢祭器亦曰畢皆象畢星也詩曰兕觥其觶角弓其觶有捄棘也

有捄天畢捄者曲而長也則畢之

狀可知矣

鄭氏曰畢狀如叉

雜記言柩用桑長三尺畢用桑

長三尺刊其柄與末詩言棘七特牲記亦言棘心七刻喪七用桑而畢亦桑則吉七用棘而畢亦棘此鄭氏所以言七畢同材也然桑黃棘赤各致其義舊圖謂七畢皆漆之誤矣特牲主人及佐食舉牲鼎宗人執畢先入贊者錯俎加七鄭氏曰主人親舉則宗人執畢導之以畢臨七載備失脫也少牢及虞禮無文何哉少牢大夫不親舉虞祭主人未執事其說是也

大射司馬正東面以弓為畢鄭氏曰畢所以教助執者則畢又可用以指教歟

蕙田案以上七柶畢

周禮地官封人凡祭祀飾其牛牲設其楅衡置其絃共

其水橐

注飾謂刷治潔清之也鄭司農云楅衡所以絃持牛也絃著牛鼻繩所以牽牛者今時謂之雉

與古者名同皆謂夕牲時也杜子春云楅衡所以持牛令不得抵觸人玄謂楅設於角衡設於鼻如檄狀也水橐給殺時洗薦牲也絃字當以旁為聲疏玄謂楅設於角者楅者相楅迫之義故知設於角云衡設於鼻者衡者橫也謂橫木於鼻今之馳猶然故知設於鼻破先鄭子春之義云如檄狀者漢時有置於犬之上謂之檄

故舉之以為況衡者也云水藁給殺時洗薦牲也者其牛將殺不須飼之又充人已飼三月不得將殺始以水橐飲飼水所以洗牲橐所以薦牲故雙言洗薦牲也云絳字當以豸為聲者爾雅有足曰蟲無足曰豸但牛絳以麻為之從絲為形以豸為聲故云絳字當以豸為聲

詩魯頌閟宮秋而載嘗夏而福衡

傳福衡設牛角以福之也 箋秋將嘗祭

於夏則養牲福衡其牛角為其觸觝人也 疏福衡謂設橫木於角以福迫此牛故云設牛角以福之也地官封人云凡祭祀飾其牛牲設其福衡注云福設於角衡設於鼻如檄狀如波注福衡別兩處設之此箋申傳言福衡其牛角為其祗觸人以及衡福為一者無文故兩解也

禮記祭統及迎牲君執紼

注紼所以牽牲也周禮作紼疏君執紼者紼牛鼻繩居

自執之入
繫於碑

陳氏禮書周官封人凡祭祀飾其牛牲設其楅衡置其絳詩曰秋而載嘗夏而楅衡毛氏曰楅持牛也絳著牛鼻以牽者鄭康成曰楅設於角衡設於鼻又曰楅衡其牛角為其觸觖人也蓋楅衡以木為之橫設於角則楅幅其角猶射以楅幅其矢也絳則少儀祭統所謂紉也少儀牛則執紉祭統及迎牲君執紉康成於詩合楅衡以為一於禮離楅衡以為二是自惑也

蕙田案以上福衡綯

周禮地官牛人凡祭祀共其牛牲之互與其盆簋以待

事

注鄭司農云互謂福衡之屬盆簋皆器名盆所以盛血簋受肉籠也玄謂互若今屠家縣肉格疏先鄭

上文福衡共為一物後鄭已不從今以互與福衡為一彌不可玄謂互若今屠家縣肉格其義可知但祭祀殺訖即有薦爛薦熟何得更以肉縣於互乎然當是始殺解體未薦之時且縣於互待解訖乃薦之故得有互以縣肉也故詩云或剝或烹或肆或將注云肆陳也謂陳於互者也

陳氏禮書牛人凡祭祀共牛牲之互與其盆簋以待

事鄭司農謂互福衡之屬盆以盛血簋受肉籠也鄭

康成謂互若今縣肉格楚茨詩曰或剝或亨或肆或
將毛氏曰或陳於牙或齊於肉蓋互牙古字通用祭
之日君牽牲入廟門麗於碑卿大夫袒而毛鷩刀以
割盛血以盆受肉以簋然後陳肉於互以授亨人亨
之掌舍設桎栒脩閭氏掌比國中宿互者互行馬也
肉格謂之互蓋其制類此鄭司農以為福衡之屬非
是

蕙田案以上互盆簋

詩小雅信南山執其鸞刀以啟其毛取其血膋

傳鸞刀刀有鸞

者言割中節也 箋毛以告純也 膋脂膏也血以告殺膋以升臭

禮記郊特牲割刀之用而鸞刀之貴貴其義也聲和而

后斷也

疏貴其義也者言割刀之用必用鸞刀貴其聲和之義聲和而后斷也者必用鸞鈴之聲宮商

調和而后斷 割其肉也

祭義鸞刀以割取脾膋

祭統君執鸞刀羞齊

疏君執鸞刀羞齊者齊肝肺也齊有二時一是朝踐之時取肝以膋

貫之入室燎於鑪炭出薦之主前二是謂饋熟之時君以鸞刀割制所羞齊肺橫切之使不絕亦奠於俎上尸

並嘽之故

云羞嘽

陳氏禮書詩曰執其鸞刀以啟其毛記曰割刀之用
鸞刀之貴貴其義也聲和而後斷也又曰鸞刀以割
公羊傳曰鄭伯右執鸞刀以逆楚王毛氏曰鸞刀刀
有鸞者割中節也孔穎達曰鸞即鈴也謂刀環有鈴
其聲中節何休曰鸞刀宗廟割切之刀環有和鋒有
鸞考之詩禮曰和鸞雖雖曰登車聞和鸞之聲有鸞
必有和鸞在前和在後詩有言鸞鑣有言八鸞則和

可知有言和鈴則鸞可知然則何休言鸞刀之制蓋有所授耳夫和非斷則牽斷非和則劇故天以秋肅物而和之以兌聖人以義制物而和之以仁鸞刀以和濟亦此意也易曰利物足以和義

說文鸞赤神之精赤色五采雞

形鳴中五音

蕙田案以上鸞刀

周禮天官凌人祭祀共冰鑑

賈氏公彥曰此云祭祀者謂天地社稷及宗廟之等皆共鑑

蕙田案鑑之制鄭康成謂如甒大口賈公彥
謂甒即今之甕也廖百子則謂上體如斗有
踈稜鏤底如風牕承以大盤置食於下設水
於上使寒氣通徹以禦暑二說不同當更考
之

蕙田案以上水鑑

秋官伊耆氏掌國之大祭祀共其杖咸

注咸讀為函老臣雖杖於朝事

鬼神尚敬去之有司以此函藏之既事乃授之疏下
二文云授杖此經唯言共杖函止謂祭祀時臣雖老合

杖但為祭祀尚敬暫去之去杖之時共杖函盛之祭祀訖還與老臣拄之老臣雖杖於朝事鬼神尚敬去之謂七十有德君不許致仕者也王制云七十杖于國八十杖于朝謂得致仕者與此異也

鄭氏鐸曰杖之有咸猶節之有英蕩爾

蕙田案以上杖咸

右器用

禮記禮運汙尊而抔飲

注汙尊鑿地為尊也疏謂鑿地汙下而盛酒故云汙尊

周禮春官甸人凡祭祀社壝用大壘

注大壘瓦壘知大壘是瓦壘者

旌人為瓦簋據外神明此壘亦用瓦取質畧之意也

禁門用瓢齋

注杜子春讀齋為渠瓢謂瓢蠡也渠盛也玄謂齋讀為齊取甘瓢割去祗以齊為尊

地官掌蜃祭祀共蜃器之蜃

注飾祭器之屬也鬯人職曰凡四方山川用蜃器春

秋定十四年秋天王使石尚來歸蜃蜃之器以蜃飾因名焉鄭司農云蜃可以白器令色白疏經直云蜃器之蜃鄭總云祭器之蜃不辨宗廟及社稷之器則宗廟社稷皆用蜃飾之知義然者案此注引左傳云石尚來歸蜃公羊以為宜社之肉以蜃器而盛肉故名肉為蜃是社祭之器為蜃也大行人云歸蜃以交諸侯之福彼則宗廟社稷之器物謂之為蜃是其宗廟社稷之器皆蜃灰飾之事也

王氏與之曰祭有酒器有肉器亦皆有以蜃為飾者鬯人云凡山川四方用蜃是酒器也大宗伯云以蜃膳之禮親兄弟之國是肉器也

春官鬯人凡山川四方用蜃

注蜃畫為蜃形蚌曰含漿尊之象疏云畫為蜃形

者亦謂漆畫之

凡裸事用概

注概尊以朱帶者疏概尊以朱帶者玄纁相對既是黑漆為尊以朱帶落腹故名

概概者橫概之義故知落腹也

凡鬻事用散

注無飾曰散疏云無飾曰散者以對概獻象之等有異物之飾此無故曰散云

鬻事者即大宗伯云鬻事祭四方百物者也

禮記禮器尊於瓶

注瓶炊器也疏鬻者是老婦之祭其祭卑盛酒於瓶

詩小雅蓼莪餅之罄矣維壘之恥

傳餅小而壘大罄盡也疏釋器云小壘

謂之坎孫炎曰酒罇也郭璞云罇形似壺大者受一斛是罇大於斛也

周頌絲衣兕觥其觶

箋釋之旅士用兕觥變於祭也箋正義曰少牢特牲大夫士之祭

也其禮小於天子尚無兕觥故知天子正祭無兕觥矣今此釋之禮至旅酬而用兕觥變於祭也知至旅而用之者兕觥所以罰失禮未旅之前無所可罰至旅而可獻酬交錯或客失禮宜於此時設之也有司徹是大夫賓尸之禮猶天子之繹所以無兕觥解者以大夫禮小即以祭日行事未宜有失故無也

陳氏禮書觥亦作觶詩卷耳七月桑扈絲衣言兕觥

則觥角爵也周官閭胥掌其比觥撻罰之事小胥觥

其不敬者則觥罰爵也先儒謂其受七升以兕角為

之無兕則刻木為之如兕角然其用則饗燕鄉飲賓尸皆有之七月言朋酒斯饗稱彼兕觥春秋之時衛侯饗苦成叔而甯惠子歌兕觥其觶則饗有觥也鄭人燕趙孟穆叔子皮而舉兕爵是燕有觥也閭胥掌比觥是鄉飲有觥也絲衣言兕觥是賓尸有觥也蓋燕禮鄉飲酒大夫之饗皆有旅酬無算爵於是時也用觥

大雅公劉酌之用匏

傳酌之用匏儉以質也
酌酒以匏為爵言忠敬也

箋

行葦酒醴維醕酌以大斗

傳大斗長三尺也

傳正義

禮器制度注勺五斗徑六寸長三尺是也此蓋從大器挹之以樽用此勺耳其在樽中不當用如此之長勺也

陳氏禮書詩大東曰維北有斗不可以挹酒漿又曰

維北有斗西柄之揭行葦曰酒醴維醕酌以大斗蓋

斗亦謂之勺勺非斗也勺挹於樽彝而注諸爵瓚斗

挹於大器而注諸樽彝舊圖樽受五斗斗實五升勺

柄長二尺四寸斗柄長三尺蓋其所傳者尚矣史記

曰趙襄子令工人作為金斗長其尾可以擊人與代

王飲厨人進斟因反斗以擊代王殺之此又非先王
之所謂斗

書顧命上宗奉同瑁

疏禮於奠爵無名同者但下文祭
酢皆用同奉酒知同是酒爵之名

也上宗鄭玄云猶太宗變其文者宗伯之長大宗
伯一人與小宗伯二人凡三人使其上二人也

蔡傳同爵名祭以酌酒者

乃受同瑁王三宿三祭三咤上宗曰饗

疏天子執瑁故
受瑁為主同是

酒器故受同以祭三祭各用一同非一同而三反也三
宿為三進爵從立處而三進至神所也三祭三酬酒於
神坐也每一酬酒則一奠爵三奠爵於地也經典無此
咤字以既祭必當奠爵既言三祭知三咤為奠爵也王

肅亦以啗為奠爵禮於祭未必飲神之酒受神之福禮特牲少牢主人受嘏福是受神之福也此非大祭故於王三奠爵訖上宗以同酌酒進王讚王曰饗福酒也

蔡傳宗伯曰饗者傳神命以饗告也

鄒氏季友曰吉祭尸受酒灌於地此非吉祭不迎尸故王代尸祭酒也

太保受同降盥以異同秉璋以酢授宗人同拜王答拜疏祭祀以變為敬不可即用王同故太保盥手更洗異同實酒乃秉璋以酢祭於上祭後復報祭猶如正祭大禮之亞獻也半圭曰璋亞獻用璋瓚此非正祭亦是亞獻之類故亦執璋若助祭公侯伯子男自得執圭璧也

太保受同祭齊宅授宗人同拜王答拜

蔡傳以酒至齒曰齊太保復受同以祭飲福至齒宅居也太保退居其所以同授宗人又拜王復答拜太保飲福至齒者方在喪疾歆神之賜而不甘其味也若王則喪之主非徒不甘味雖飲福亦廢也

蕙田案以上汙尊也大壘也瓢齋也蜃尊也概尊也散尊也瓶也觥也匏也斗也同也皆非宗廟所用而為他祭祀之尊汙尊禮運汙

尊而抔飲鄭注鑿地為尊大壘春官鬯人社
壝用大壘鄭注瓦壘賈疏知大壘是瓦壘者
旂人為瓦簋據外而言此壘亦用取其質畧
之意瓢齋鬯人崇門用瓢齋鄭注瓢謂匏蠡
齋讀為齊取甘瓠割去柢以齊為尊屨尊鬯
人凡山川四方用屨鄭注屨水中屨漆尊畫
為屨形蚌曰含漿尊之象也案地官掌屨祭
祀共屨器之屨是以屨為飾非畫為屨形也

山堂云口徑一尺二寸底徑八寸足高二寸
下徑九寸底至口上下徑一尺五分容五斗
概尊鬯人凡裸事用概鄭注概漆尊以朱帶
者賈疏概尊朱帶玄纁相對既是黑漆為尊
以朱帶落腹故名概尊裸從埋謂祭山林山
堂云形制容受一如屨尊散尊鬯人凡鬯事
用散鄭注漆尊無飾曰散山堂云概尊散尊
皆容五斗案此與角散之散不同彼散爵容

五升此散尊容五斗大小殊也瓶禮器與者
老婦之祭尊於瓶鄭注盛酒於瓶詩小雅瓶
之罄矣維罍之恥朱傳瓶小罍大皆酒器也
觥一名兕爵陳氏禮書曰詩卷耳七月桑扈
絲衣言兕觥則觥角爵也罰爵也匏爵公劉
詩酌之用匏疏云匏自然之物陸佃禮圖云
舊圖用匏片為爵據此乃杓也若爵宜截其
鼻以盛酒不應破匏為之大斗行葦詩酌以

大斗毛云大斗長三尺疏云長三尺謂其柄也此蓋從大器挹之於樽用此勺耳同周書顧命上宗用同瑁孔傳同爵名疏云禮於奠爵無名同者但下文祭酢皆用同奉酒知同是酒爵之名王氏詳說曰銅爵以非宗廟所用故附器用之末云

右器用附

五禮通考卷六十六